


QUÆSTIO MEDICA.

Quodlibetariis disputationibus manè discutienda in Scholis
Medicorum, die Jovis decimâ octavâ Decembris 1710.

M. JOANNE FRANCISCO COUTHIER,
Doctore Medico, Præside.



An, omnium universi Corporis partium nutrimentum idem?
I.

ALIMENTA vitæ semina nullus negaverit, quem non latet sine illis diù vivere non posse animal. In utero vix animalis partium fit expansio, cùm cibum exigit fœtus suæ avidus perfectionis. Quod in utero sumit alimentum fœtus in lucem editus, illud idem surgit lactis nomine celebratum. Grandior jam factus, solidiori, contendo solvendoque, nec non digerendo evadit non impar. Munus hoc solida, vi majori instructa, obeunt, juvatque liquorum, ut decet exquisita indoles. Ciborum varium genus in escam capit, suæ perfectionis jam compos, animal. Alimenta cujuscunque fuerint naturæ & indolis, succum suppeditant alimum, quo perpetuò reparantur vires, jugi partium motu continuò labascentes. Omnes quæque corporis partes, ut ut diversæ, succum hunc eundem excipiunt sumuntque, & retinent debite præparatum. Huicque, quotquot sint, jacturæ suæ reparationem, augmentum debent & perfectionem. Ossis dura compages, non ex alio fonte suum haurit succum, quàm à cibis; non aliam suæ rigiditatis materiam agnoscit, quàm succum, partibus carnosissimam molliem, liquoribus fluiditatem, spiritibus agilitatem & cælestem quasi substantiam largientem. Quanta igitur in rerum naturâ simplicitas. Quantus mentis error, sibi rerum naturam ex umbris & imaginibus repræsentantis. Hæc etenim sortis humanæ lex est & conditio, ut sensuum ope, sæpè fallacium, cognoscat & judicet. Hinc tot sibi mentitur imaginatio sensuum errori obnoxia. In corpore humano partes variæ cùm consistentiâ, tum figurâ & usu conspiciuntur. In alimentis partes delitescent figurâ motuque corporis humani partibus correspondentes: quis has illis natas & unice aptas primâ facie non pronuntiaverit. At imò quicquid laudent sensus & comprobent judicium, ciborum varietas nutrimenti nullatenus asserit diversitatem, neque vario refici partes varias alimento explicat. Nutrimentum in omnibus partibus idem; quicquid enim eundem obtinet effectum per eandem viam, indubiè eandem causam redolet & affirmat: nec impedimenta aut subventanea rerum unquam mutare valent

A

essentias, quas tantum oculis & intellectui magis occultas & confusas representant.

I I.

RERUM nosse causas soli conditori competit. Prometheum hunc habe, qui illarum sibi asciscere cognitionem tentabit temerarius. Effectus, mentis humanæ sunt prædia, ultra quæ semper dubius homo vagabitur, Icarique præcitem in mare casum offendet, solis calorem propius accedens. Lucis causam & rationem perpendere tibi est animus. Hermeticorum evolvis principia. Peripateticorum dogmata examinas, Democritum consulis, Cartesio incumbis & studes. Horum quisque suam laudat opinionem, alienamque explodit. Scrupulosus hanc modò pensitas, modò illam, illam modò amplecteris vagus & incertus: dubium & errorem ubique nancisceris, demumque ad ignorantiam scopulos naufragus allidis. Quoniam igitur rei noscendæ confugas cupidus? sensus corporea rimantur objecta: intellectus de his judicat. Spiritualia mens contemplatur, ea sibi corporum more comminiscens. Corporum perceptio vera & intima hominem nunquam penes erit: illa tantum nobis objicit generalis conceptus & idea. Extensio, nostræ cognitionis & de corporibus assertionis unica sit norma: & quæ in illis eminent differentiam aut accidentia, plerumque fugiunt mentis captum. Ignotum igitur ex minus ignoto deregimus imbecilli. Ignote rei cum cognita comparatio, nostram omnem astruit scientiam & complectitur: hinc quæ iisdem motibus agi, iisdemque planè terminis contineri animadvertimus, similia hæc, eademve proferimus. Cum igitur nostræ cognitionis Analogismus sit quasi fides, illius conditiones ritè callere necessum; aliàs in rebus implicitis dubium & error. Corporum diversitas proprietatibus qualitatibusve variis innotescit & distinguitur. Qualitates materiæ accidentales à motu & figurâ sive speciali fermento, aut, ut placet antiquis, formâ peculiari, sobolescunt. Eandem ideò habe materiam, quæ iisdem motibus agitur, iisdemque terminis sive figurâ prorsus eadem exornatur. Res etenim proprium peculiaremque motum obtinent & terminum ab eodem fonte scaturientes. Non aliam init viam in vegetalibus arboris procreatio, quam fruticis aut herbæ. Utriusque seminis in terrâ sit solutio seu putrefactio. Utraque suo crescit tempore, statoque fructus edit, juxta speciem, legitimos. Hæc tam adæquata utriusque conformitas similitudinem aut identitatem probat genericam, quâ hanc & illam simul dignoscimus, tanquam ab iisdem principiis necessariò exurgentes.

I I I.

ANIMALIUM vita, ut & vegetabilium, motu innotescit, motuque incipit & ad finem usque, nempe subjecti resolutionem sustentatur. Ovum pulli delineatas continet partes, & includit

3
 quiescentes. Hâc quiete & otio sepulchræ jacent, donec calor lenis
 actio, illas è suo excitet stupore. Gallinæ incubantis tepor blandus,
 motum hunc parit fecundum, quem artis industria non nunquam va-
 let imitari, maximè in plagis orientalibus, quæ quotidie pullorum
 exclusionem, absque gallinæ interventu oculis offerunt. Vegetabi-
 lium semina, ovorum instar, plantam omnem & integram oculis my-
 croscope armatis liquidò objiciunt: hæc in rebus, ad sensuum examen,
 vitam agentibus, miranda & fida conformitas, naturæ simplicitatem
 & constantiam, quovis eloquio & oratione, prædicat excellentiùs.
 Plantam in semine tanquam in carcere inclusam vitæ radiis orbatam
 vides, donèc motus hanc torpidam adigat & stimulet. Terræ centra-
 lis calor solarisque, motum debitum creant, cujus duratio perseverat
 ad terminum & metam suæ speciei à summo opifice præscripta. Motus
 vitæ author, hujus est & reparator, alimenta præparans & cuique,
 quod deficit, impendens. Quæ motu vigere conspicies alimentum
 suppeditant. Quid mirum? *simile gaudet simili*. Metallorum ponde-
 rosa moles hominum nutritioni prorsus inhabilis existit, quicquid de
 auro potabili promulgent & asserant Alchymistæ. Mineralium hirsuta
 & rigida compages, ex suâ naturâ alendis animalibus nunquam idonea.
 In utrisque motus abolitio & cessatio, constrictam effecit materiam sic
 & ponderosam, ut ventriculo cæterisque corporis partibus onus grave
 potius & molestum sit, quam naturæ opus indigestum & rude. Ali-
 mentum ideò illud dicas, quod motui aptum agnoveris, sine quo nulla
 unquam absolvetur nutritio. Motus aptitudini & conservationi con-
 ducit imprimis consistentia mollis & unctiosa: non etenim hujus na-
 turæ cibi, motum duntaxat recipiunt, quin & sovent augentque, prop-
 ter materiam tenuem & atheream inibi conclusam & nidulantem.
 Hinc animalia cibum largiorem suppeditant quam vegetabilia; ex illis
 alia plùs, minùs alia, prout illorum succi nutritii fuerit labor & præ-
 paratio: sic caro bovis, vitulinâ plùs nutrit. Vitulina pinguiorem
 dat quam agnina cibum, & sic de reliquis, modò cætera inter se sint
 consentanea. Ciborum varietas, tum ex vegetabilium, aut anima-
 lium infiniti propè numeri parte, cum ex variorum condimentorum,
 quibus alterantur, coalescit: illorum non est ad lancem & libellam fa-
 cilis delectus. Alii, palato etiam suaves, minùs nutriunt: alii sapore minùs
 exquisito præditi, magis citiusque cibant. Ea verò ciborum lex hæc sit
 & norma, scilicet nullam ventriculo inferant gravationem aut exolu-
 tionem, at exurgat blanda & tranquilla totius corporis & cita pro-
 deat refectio. Ex alimentorum numero & ordine Potus, qui multifa-
 rius, pro regionum feracitate & hominum conditione usurpatur. Ca-
 lidæ regiones vino gaudent, frigidæ zithum epotant, aliosque facti-
 tios, aliæ sibi in potum assumunt liquores, tum ex fructibus expressis,

plantarum infusione, decoctione: & eo ritu homo sensibus nimium obtemperans, potius necessitati voluptatem & delicias adjunxit. At qualis sit potus, verum duntaxat & sincerum existima, qui cibum diluere solvere, & salium duram compagem effringere, aciemque delere potis est. Cibi potusque numerus tantus tamque, pro illorum diversa indole, diversus, partes corporis, ferè pariter innumeras & diversitate illustres indiscriminatum nutrit. Hujus alimenti cum hac illave parte specialis analogia, à salibus sulphuribusve aut partium figurâ & motu pendens, nullatenus absolvit nutritionem: omnium quantumvis diversarum corporis partium nutrimentum idem, suæque præparationis eadem media sive instrumenta, æquè in his ac in illis partibus exigit & obtinet: eundem & effectum parit ubi vis nutritio, animalis incremento, perfectione, aut refectione conspicuum.

I V.

NUTRITIONEM absolvit succi digestio, quam inchoat solutio, fermentationis nomine vulgò insignita. Solutionem anteit cibi particularum contritio, solidorum motu & robore peracta. Chylus ita commolitus attritusque, vasa, angusta quamvis, permeat, perlustratque, à quibus, ulterius progrediens, ulteriorem adipiscitur evolutionis gradum. Hanc partium chylosarum explicatione, perfectæ solutioni idonea fit alimentaris materies. Varios liquores, quibus corporis quædam partes quasi turgent, huic operi ferunt natos plerique, bilis cum succo pancreatico in intestino luctam concitam, solutionis illius legitimæ causam autumantes. Etsi hæc de solutione opinio malè sit illius naturæ consona, tamen hæc effervescentia chyli defæcationi non inutilis, partes crassas ac impuras à tenuibus purisque eliminans. Hæc in his partibus secretio sensibilis, plures alias, quamvis insensiles, affirmat peræquè utiles. Glandularum implicatio id operis exequi videtur, quantum ex autopsiâ licet judicare, pro illarum peculiari fabricâ. Vasorum quibus coalescunt & intertexuntur glandulæ non idem diameter, nec eadem diametri figurâ; nec idem fermentum; hinc liquorum, quos secernunt, repetenda diversitas. Horum tenuis & lymphidus alter; alter crassus & turbidus amarum hic, acidus ille aliisve saporis fuerit particeps. Glandes ubi vis inesse neminem fugit, nullaque illis liquoribus excernendis, corporis pars deprehenditur magis accommodata: quos amandant liquores à sanguine per arterias advecto emulgent. Glandulas itaque defæcationis officinas existima. Quot quot qualesque sint, succi alimentaris dissolutionem aggrediuntur; huicque promovendæ non parùm utiles. Suo quoque modo & more solutionem liquida juvant, maximè sales solvendo sulphuraque evolvendo quibus coercetur & intricatur pars alimentaris in chylo immersa. Quot, obstupefcens, inquires, instrumenta; quot labores

241

5
solutionem moliuntur: at cibum in materiam simplicem & homogeneam solvi necessum tene, ut quolibet inire partes valeat illisque penitus adhærescere: non alium sanè laborem non minùs arduum concedes, hujus veritatis conscius. Quid nutritio sive digestio? Succus nutritii in partem quamcunque alibilem conversio & transmutatio. Hæc substantiæ metamorphosis materiam requirit nullis qualitatibus accidentibusve infectam. Qualitates materiæ mera sunt hujus accidentia, quæ solutionis beneficio, inviolata, dimittit. His igitur sese exoneret, omnes formas indutura; nam quicquid omnibus est idoneum characteribus, nullius actu debet esse tenax: alias huic illive excipiendo fit impar, nisi priùs, quos ante obtinebat, dimiserit. Cera indiscriminatim sigillorum subit impressionem: at ubi novam vis excudere, prima deleatur necessum. Alma chyli portio omnes nutrit partes, quarum aliæ sunt hujus, alius aliæ penitus dissimilis consistentiæ & genii diversi: omnibus idèò qualitatibus exuat sese nutrimentum. Veteres nutritionem assimilationis causâ fieri contendebant nec immeritò. Quæ enim pars, aliam subit & quasi penetrat, nisi fuerit similis utriusque indoles & natura. Oleum olei admittit mixtionem & consortium, quod respuit cum aquâ, quovis artificio tentatum; naturam idèò similem pars alenda sibi vult in nutrimento. Quot igitur in alimentis hospitantur partes diversæ: at panis, quo solo miselli quidam aut sobrii vescuntur, tantam ne largitur diversitatem in suis intimis absconditam? nequaquam, & illud admittere rationi & experientiæ valdè dissonum. Succus simplex & homogeneus harum qualitatum vices gerit & locum, ut porè quibuslibet sociabilis. Quid corporum adhæSIONem prohibet? Hæterogeneitas, quæ sanè nulla in succo simplici, in quo omnia ea sunt proportionè exquisitâ, ut hoc illud non superemineat principium. Sincerus purusque manet succus, donèc illum subeat fermentum, cujus naturam subito facilis induit & characterem. Fermenti nomine placet illud, quod suæ indolis vim geniumque valet induere, undè res illo subacta fit aliud quàm quod fuerat ante; quemadmodum acetum vino impertit & communicat, fermentum massæ farinaceæ sic & de cæteris. Quotquot in universo diversa suo speciali donantur fermento, aliàs in rebus nulla foret distinctio; nullus ordo: quæ idèò fermentum unicum possident, corpora homogenea dicuntur, nullisque sunt instructa organis; quod liquidò patet in metallis quæ perfectæ decantant Alchymistæ, qualia sunt aurum & argentum in quibus purus agnoscitur mercurius: hæc homogeneitas in hydrargyro paritèr Elucescit. Materiæ nutritiæ homogeneitas, multiplicitatem partium exposcit quibus absolvitur. Illam instrumentum unicum, nec liquor unus potest expedire. Mirari desine: tenuis hæc & pura substantia innumeris obleratur involucris, Sales illam quasi figunt,

irretiunt sulphura, viscida implicant, terrestria obruunt, & immergunt aquea. Horumque vinculorum disruptionem solutio intendit, solidis liquidisque tentata. Tot organorum auxilio sic expedita materies, digestionem fit congrua, primique fermenti afflatu, simplicitatem, tot laboribus & peregrè modò comparatam, amittit, naturæque fermenti, quo spiratur, fit particeps, servatque ad novæ solutionis opus & actionem. Nova solutio, mortis & vitæ alterius causa. Animal interit: ipsius cadaver motus & solutio aggrediuntur: ex illo, speciei novæ resurgunt animalcula. Hæc est Poëtarum metamorphosis: Veterum transformatio & Metempsychosis: hæc materia simplex, Proteus ille, qui in omnem formam se fingit, fermenti adventanei virtute. Fermenta non mole; at virtute illustria, quod illorum exigua patefacit quantitas & fere insensibilis, effectus tam conspicuos proferens. Formarum hæc mutatio naturæ integritatem servat & fovet: nihilque sic in mundo fit mortuum & iners, aliàs nova creatio quolibet momento esset admittenda, perpetuæque annihilatio; quolibet enim momento animalium & plantarum fit interitus & generatio: hæc divina rerum harmonia, Macrocosmi vera est circuitio, quam non malè representat circulatio in animali peracta, ipsius durationis causa & origo.

V.

CIBORUM varietas, qualis quantaque sit, diversis corporis partibus reparandis malè arrogatur. Natura ceratoris Icon simplici semper utitur viâ. Simplicitatem hanc parit multiplicitas ab organis & liquoribus accepta. Quid igitur mirum quòd ciborum diversa indoles nutrimentum idem suppeditet. Toxicæ & venenæ in bonum valent nutrimentum facessere, modò illorum debita fiat præparatio, modò exurgat vera solutio, materiam simplicem & homogeneam eliciens. Ideò non tantum moveat scrupulum, non horrorem tantum incutiat hæc alimentorum varietas, quæ ultra modum sumpta, toxici pedetentim irrepentis more, Magnatibus præmaturam infert mortem; in his si aurea fervetur mediocritas, à Mensis non erunt omnino ableganda: hæc etenim prostratum leniter stimulant appetitum, inertemque ita & sopitum recreant ventriculum, ut ad consueta munia, quorum fuerat immemor, jucundè revocent. Cùm absque solutionis auxilio nulla unquam fiat nutritio, illius naturam & conditiones cognoscere incumbit, quæ hisce continentur legibus; primò ut sit blanda & quasi insensibilis: secundò ut menstrui ope solubili planè analogi & homogenei succedat: terriò ut menstruum & rei solutæ sit mixtio & cohesio sic intima, ut hæc ab illo nullâ sit arte separabilis: tandem ut ex illâ commixtione subiecti perfectio exurgat. Hinc chymicorum liquorum lucta improprie solutionis nomine laudatur, quorum motus violentia sensibilis, utpote ab

heterogeneitate concita, quam sequitur præcipitatio, sive partium crassarum ejectio & separatio. Hæc in metallis admota solutio, metallicas tantum partes atterit, comminuit, & quasi erodit, in metallum nihilominus reducibiles: menstruaque ab illis facile secedunt heterogenea, & nulla hinc solutis metallis accedit perfectio nova. Hæ separationes artis sunt effectus, nullatenus naturæ, cujus opera blanda semper, amica & proficua. In vegetabilibus seminibus solutionem consule: nulla sensibus lucta patet: nullus ferè motus. Aqua, solvens sive menstrui munus gerens, semen permeat, dilatat, extendit sensim sine sensu, & inhaeret ita ut utriusque unica fiat substantia. Quid inde resurgit, speciei conservatio & multiplicatio. Quicquid igitur ab illâ naturæ simplicitate & constantiâ recedit; quicquid violentum, naturæ molestum judica. Motus rapidus & effrænis confusionem parit homogeneitati & puritati contrariam. Fecundatum ovum gallinæ leni committe calori excludendum, fiet necessariò pulli exclusio; caloris gradus ulterior partes ita confundit, ut earum nulla distinctio; liquida citiori & præcipiti nimis aguntur motu, unde liquorum indebita commixtio, organorum inde nullus ordo, nulla hinc pulli exclusio sive ortus. Hæc animalis sit nutritionis norma, cum hujus vera sit imago. Ventriculo cibos ingeris, statim exurgis, incedis præceps, anhelus curris, gravatum persentis ventriculum, solutionis arduæ aut nullius argumentum. A pastu largiori liquores hauris ardentes: calor angit, sitis urget inexpléta, solutionis impeditæ verus index: hoc etenim potu, vasa nimium sollicitas & adigis, motumque citra naturalem cæs solutioni penitus adversantem. Chymici, apud quos ignis frequens usus, religiosam habeant hujus rationem, cum aquas, solutiones, extracta habere utilia voluerint: ignemque hunc unicum judicent utilem, quem caloris naturalis cognoscent æmulum; menstrua adhibeant, quorum indoles solubili non fuerit dissona. Plantæ cujusdam vires obtinere animus est, hujus succum exprime, in hoc ejusdem speciei plantam igne lento macera, aquam, ignis, quantum potest, analogi beneficio, elice: hæc aqua solve extractum, & eo ritu plantæ vires parum adulteratas possidebis. Alimenta succum continent solutioni multum opitulantes: quæ tali succo quasi immerguntur, non multum nutrimenti conferunt, citiusque, quam par est, in ventriculo diluta, ad intestina devolvuntur & procidunt; ex his inter vegetabilia plurima, veluti olea, fructus aquei, quales sunt cerasa, pruna, melones, &c. quorum est natura ventriculum & intestina exolvere & inturbare, unde hentericæ, celiacæ, diarrhææ, dysentericæ non insolitò sobolescent; quorum effectuum ratio non tam ab hujus succi quantitate, quam à cruditate repetitur. Quæ humoris non affatim exudant, difficilè &

rarò solvuntur, qualia sunt fungi; fructuum cutis, animalium pellis, partes membranaceæ & tendinosæ. Pro tali cibo incalescit ventriculus, febresque inde non infrequenter suboriuntur. Cibi quorum apud hominem usus frequentior, succi diluentis quantitate fruuntur modicâ (cujus idè digestio legitima successit.) Hi facilem blandamque corporis redintegrationem conciliant. Frumentum eo gaudet succo, quem animalium musculosæ partes nobis quoque ad dapes offerunt; Unde minùs hisce satiatur ventriculus, aut fastidit, quàm alia bene multa, quorum sapor palato maximè blanditur. Non totum solutionis opus succus alimentorum unicus absolvit. Juvat hanc & adimplet liquor, cujus animal dives: quæque corporis pars illo recreatur & reviviscit, aliàs protinùs peritura. Solida ab illo vim & elatorem mutantur. Fluiditatem ab illo liquida desumunt: motus enim est author & actor liquor is, sive menstruum universale, in corpore animalis spiritus nomine commendatum. Spiritus substantia præ cæteris tenuissima ignisque naturam repræsentans ob puritatem, velocitatem, & invisibilitatem. Spirituosam hanc materiam agnoscere, tanquam solutionis causam & instrumentum constat. Nullius est indolis nec figuræ, omnium verò capax, hinc cibum citò & intimè pervadit, perlustrat, succo quem obtinet adhærescit, movet, agit huc illucque expandendo, unde jam triti blanda fit cibi prostratio, fusio, denique vera & legitima solutio. Ciborum idè solutionem promovent quæ spiritus valent recreare, reficere, & novos supplere, sicuti vinum, si modus servetur; hinc si nutritionis causas vis rimari & consulere, esto memor spirituum animalium, succi nutritii dissolutionem concitantium. Spiritus ubicumque corporis partium. suas exerunt vires: nulla non corporis pars illis animatur.

Ergo, omnium univèrsi corporis partium nutrimentum idem.

Domini Doctores disputaturi.

M. Francisus Aiguan.

M. Michael Ludovicus Re-
neume de la Garanne, Scho-
larum Professor, & Regia
scientiarum Academia socius.

M. Michael Pichonnat.

M. Jacobus Fournéau.

M. Raymundus Jacob Finot.

M. Francisus Picoté de Br-
lefré.

M. Ludovicus Franc du Tal,
Pharmacia Professor.

M. Claudius Berger Medicus
Regis ordinarius, & Regia
scientiarum Academia & in
horto Regio Chymia Professor.

M. Nicolaus Bailly.

Proponēbat Parisiis JOANNES HENRICUS IMBERT Parisinus,
Baccalaureus Medicus. A. R. S. H. 1710.

Apud viduam Francisci Muguet Typographi Regis. 1710.